

## Tiwei Pol Kewisik Ken Wit Filipai

### Menmen me tiwei ik

Pol katip hirak kitehi God ke mit me wit Filipai  
*1:1-11*

Menmen epei man mewaank Pol *1:12-26*

Menmen mit nanisesim nentar hir ne Krais  
*1:27-2:18*

Pol kewepyapir menmen Timoti ketike Epafro-  
daitas tiriakem *2:19-30*

Pol katip mit hir naanmipre hiras me mit enun  
netike menmen enum *3:1-4:9*

Him me Pol ketike nirak yinan neit wit Filipai  
*4:10-20*

Pol katip mit ne Filipai him mikaru *4:21-23*

### *Tiwei Pol kewisik ken mit ne Filipai*

<sup>1</sup>\* Hi Pol hetike Timoti hawir wirak menmen iuwe me Jisas Krais kerekek. Hawir wesiuve tiwei ik ken yi mit kerek yin in naanmipre mit miyapir ne weiwick me God yetike yi mit yekepi yeit wit Filipai, yi yetike mit yapirwe ein kerek yi yises him me Krais Jisas. <sup>2</sup>\* Hawir hanhan God Haai kaiu ketike Nikan kirak Mitik Iuwe Jisas Krais hirakit tatreyki yaaim, yi eiyu werek werek.

*Pol kitehi God kakikaap mit yapirwe nankine  
tiwei ik*

---

\* **1:1** Ap 16:12-40    \* **1:2** Ro 1:7; Ga 1:3; Fl 3

**3** \*Hi hatip God hırank yaaik kentar hi han kitet hırank kerekyi yi yaain te yi mit epei yırıak menmen yaaim. **4** Wi ham hi hitehi God menmen hi han yaaik hitıwekhi me yi mit yapırwe **5** hentar yi yekepa haiu matıp mit miyapır him me God, nıpaa yi yinın yemtewem ere in. **6** \*Hi hertei menmen im werek werek. God kerekerek nıpaa kerekyi yi yisesik hırank kakıkepi yi yeipisesik werek werek ere maain wi Jisas Krais pike kaknen kakwepyapır hırekes. **7** Hi hanhan yi mit yekre han kai. Im yaaim mentar God epei kırıak yaaim kikaap haiu mit nıpaa wi hi hepu hekre wınak enuk ke gavman o wi hi hepu witeik, hi hewepyapır him me God hi hari han ke mit te hır nisesik heriuwe menmen hi hırankem. **8** \*God hırank kertei hi hanhan iuwe me yi mit yapırwe har ke Jisas Krais hanhan yi mit.

**9** Hi hitehi God te yi mit han teweninan wısenum, yi eiyırtei menmen me God werek werek, yi eiyırtei mekam yaaim mekam au enum, **10** \*te yi eiyises menmen yaaim iuwe te menmen enum ap mamu mamıkre han ki au me wi Krais pike kaknen. **11** \*Te in ek Jisas Krais kakrekyi han ki yaaik kau him keriuwe menmen yaaim, yi eirıak menmen yaaim te God kakıt niuk iuwe kakınterim.

*Pol kepu wınak enuk, menmen im mıkaap him  
me God mamno heriyai heriyai*

---

\* **1:3** Ro 1:8; 1Ko 1:4    \* **1:6** 1Ko 1:8; Fl 2:13    \* **1:8** Ro 1:9; 2Ko 1:23    \* **1:10** Hi 5:14; Fl 2:16; 1Te 5:23    \* **1:11** Jo 15:8

**12** \*Nai yinan, hi hanhan te yi eiyırtei menmen im epei man merewaank hıram man mewaank him me God au. **13** \*Hıram men mıkaap mit ne ami ne gavman netike mit nau menep menep hır nertei hi hepu hekre wınak enuk ke gavman ik e hentar hi hises him me Krais. **14** Nai yinan in yapırwe hır ap nınaain te hır natıp mit him me God wısenum nentar hır nıra hi hepu wınak enuk ke gavman ik ek. Hır han kitet Mıtık Iuwe Krais kakıkepi.

**15** Mit han natıp mit miyapır him me Krais nentar hır hanhan nanri mit nanises him mir te hır nanwenipi niuk mir. Mit han newepyapır him me Krais nentar hır yaain hır hanhan nıriakem nankepa. **16** Mit han yaain hır nıriakem nentar hır hanhan neriuwa. Hır nertei God kehimitenä hi naanmıpre him mirak hewepyapırem heit in. **17** Mit han newepyapır him me Krais nentar hır hanhan neriuwa au. Hır han kitet hır nenipau hi yınk enuk han enuk hentar hi hepu wınak enuk ik ek hır nari mit yapırwe hır nanisesi, te hi au. **18** Hıram emırem! Hi han yaaik heriuwerem hentar mit hır newepyapır him me Krais me han kır yaaik o han kır enuk. Hi han yaaik ehu entar hi hertei.

### *Hi hepu tı ik, hi hewenipi niuk me Krais*

**19** \*God himin yaaik kerek Krais epei keriuwetek kan kakıkepa kakwisa hi eno witeik entar yi yitehi God kakıkepa.

---

\* **1:12** 2Ti 2:9    \* **1:13** Ap 28:30; Ef 3:1    \* **1:19** 2Ko 1:11

**20** \*Hi han kitet hi ap epakin him me God te hi yink enuk eriuwe h̄irekes hentarim te hi han tokik ehu hi hatip mit him mirak har ke nipaai ein ere in hi hewepyaprem. Hi ehu o maain mit ne ami naniyep hi hahi, hi hanhan mit nantip Krais h̄irak yaaik nanitar menmen hi h̄iriakem.

**21** \*Hi ehu te hi ehises Krais. Hi au hahi te hi ehit menmen yaaim im e: Hi ehu etikerek. **22** \*Hi hahi o ehu, te maain menmen hi h̄iriakem mamkaap mit nanises Krais. Hi hepitari mekam minin. Hi hahi o hi ehu. **23** \*Hi han kai kekrit kekrit. Hi hanhan te hi hahi te hi ehu etike Krais. Hiram yaaim iuwe. **24-25** Au, hi amit ehu te hi ekepi. Hiram minin. Hi han kitet hi hahi au ehu te hi ekepi yi eiyises him me God werek werek yi han yaaik eiyintar hi wen hepu. **26** Maain hi enen ehu etikewi yi han yaaik yeriwa wisenum te yi eiwenipi niuk me Krais.

*Mit ne Filipai netike Pol h̄ir nekiyan nanises him me Krais*

**27** \*Mekam mamnen yi han kitet menmen im. Yi eirak menmen yaaim mar ke mit h̄ir nises him me God te maain hi ari o au, hi tewen ehimtau him yaaim mit nanitpim me yi mit, yi eikiyan eiyu han kiutip. **28** Yi ap einaain eiriuwe mit enun nerekyi enum au emit! Yi eiyarp eitip mit him yaaim me God keremem, te menmen im meteiknor maain God h̄irak kakwaanki, te meteikni yi au maain God kaktihiis yi eiyu werek werek. **29** God kewisi yi yises him me Krais

---

\* **1:20** 1Pi 4:16   \* **1:21** Ga 2:20   \* **1:22** Ro 1:13   \* **1:23** 2Ko 5:8   \* **1:27** Ef 4:1; 1Te 2:12; Fl 4:3

weinim keremem au. God kewis mit enun hir nerekyi enum nentar yi yisesik. <sup>30</sup>\*Yi yetikewa haiu mekiyan mit hir nanwep nanraiwaank nar ke nipaai ere in yi yertei hir neiyep nerewaank.

## 2

*Haiu mewenin han kaiu han ekitet mit hir nises him me God*

<sup>1</sup> Yi han ki kepu tokik kentar yi yises him me Krais. Yi han yaaik yepu yentar Krais hirak han tewenini. Yi yetike God Himin Yaaik yi yau han kiutip, yi han ekitet mit yi han etwenini. <sup>2</sup> Menmen im epei mau han ki te yi einipa te hi han yaaik iuwe. Yi eikiyan eiyu han ekitet menmen miutip, yi han tewenin mit netike God. Yi eiyu han kiutip kerek. <sup>3</sup>\*Yi ap han ekitetan me yi hiras keriyen au. Yi han ekitet mit han menmen hir han kitetim. <sup>4</sup>\*Yi ap eirak menmen te mit nantip nanwenipi yi iuwe au emit! Yi eiwenin han ki yi han ekitet mit hir ninini hir yaain.

*Krais kinaaiwir menmen mirak yaaim kekepai te God kewenipiyek hirak Iuwe*

<sup>5</sup> Yi han ekitet menmen yar ke Krais nipaai hirak han kitetim. Hiram im: <sup>6</sup>\*Hirak kertei hirak kipre God te hirak ap hanhan kaku kakir ke hirak. Au, <sup>7</sup>\*hirak keweikin sip kewetiwem hirak hirakes keweikinhis kire mitik weinik Maria winaak, hirak kepir ke haiu mit. <sup>8</sup>\*Hirak

---

\* **1:30** Ap 16:19-40; Fl 1:13    \* **2:3** Ga 5:26; Ro 12:10    \* **2:4**  
 1Ko 10:24, 33    \* **2:6** Jo 1:1-2, 17:5    \* **2:7** 2Ko 8:9; Jo 1:14; Ro  
 8:3    \* **2:8** Jo 10:17; Hi 5:8, 12:2

keweikinhis kar ke mítik weiník, hírak kewenin han kírak kises him me God. God katip hírak eki ekikaap haiu mit, te hírak kises him mírak hírak yínk kekek hírak kaa kentar nu tentarakit. <sup>9</sup>\*Hírak kaa kentar nu tentarakit kíre mítik enuk, te God katip hírak enuk au. Hírak kewenipiyek katip hírak yaaik wísenuk. <sup>10</sup>\*Hírak Mítik Iuwe kinin menmen yapírwe. Hírak yaaik wísenuk te neimín neit wit ke God o nepu ti in o mit epei naa níwaai ti o tipir, hír nanímtau God kekine niuk me Jisas, hír yapírwe nanineinik nanwen ninip nantip nanir ik: <sup>11</sup>\*“Hírak Yaaik au Iuwe,” hír nanwenipi God Haai hírak iuwe kakintar menmen im me Krais.

*Haiu mamre si mamteikin mit yayiwe ke wítaan, haiu emteiknor yayiwe ke God*

<sup>12</sup>\*Nai yinan nípaa hi hepu hetikewi yi yemtaw him mai yi yisesim. In ek hi hepu hetikewi au hi heit yanímín. Yi eiyisisa eiyír ke nípaa ein yi yisisa te in ek yi eiyises him mai wísenum. Yi eiyises menmen nípaa God kerekyyiyem te maain hírak kaktihis. Yi einaain eipírpír te yi ap einipek yínk enuk ekíriuwi. <sup>13</sup>\*Yi eiríakem eiyíntar God hekrit hekrit kíriak han ki te yi hanhan eiyises menmen hírak hanhan yi eiyisesim.

<sup>14</sup> Menmen yapírwe yi yíríakem yi ap yenehan yenepan yeriuwerem au emít! Yi eiríakem keremem. <sup>15</sup>\*Yi eiríakem mamír im te yi ap

---

\* **2:9** Ap 2:33; Ef 1:20-21; Hi 1:3-4    \* **2:10** Ro 14:11    \* **2:11**  
 Ro 10:9    \* **2:12** Sam 2:11; 1Pi 1:17    \* **2:13** Jo 15:5; 1Ko 12:6,  
 15:10; 2Ko 3:5; 1Te 2:13    \* **2:15** Dan 12:3; Mt 5:14, 10:16; Ap 2:40

eiriāk menmen enum au yi eiyu yaain. Yi yaire n̄ikerek ne God yi yaain yar ke si me w̄itaan m̄īr, yi yau n̄im̄in ke m̄it h̄ir n̄iriāk enum enum, **16 \***yi eiȳtpor h̄im̄ yaaim me God mamkaap m̄it h̄ir nanu werek. Yi eiriāk menmen im te maain Jisas p̄ike kaknen hi han yaaik entar hi hertei menmen hi herekyiyem h̄iram wein̄im̄ au.

**17 \***Yi yises h̄im̄ me God h̄iram mar ke yi yewepwar yewis menmen mau k̄inan yewet God em. Maain h̄ir m̄it naniyep hi hahi hemkre mamwen h̄iram m̄ire m̄it neit t̄ipar naam ner-paasem neiȳim̄ nenke menmen. Hemkre mai mamwen h̄iram mamkepi yi eiȳses God werek werek, te hi han yaaik w̄isenuk. **18 \***Menmen im mamnen te yi han yaaik eitikewa eiȳr ke hi han yaaik.

### *Pol ketpor ke Timoti*

**19** Hi hanhan M̄itik Iuwe Jisas kakwisa hi eriuwet Timoti kaknen kakir yi m̄it te maain Timoti p̄ike kaknen kak̄tpo hi ertei yi yepu werek yises God, te hi han yaaik eriuwi. **20** Hi ap m̄itik kei yaaik k̄ipir ke Timoti. H̄irak k̄ipra te h̄irak hanhan kak̄kaap yi m̄it eiyu werek werek. H̄irak kiutip kerekek. **21 \***M̄it han h̄ir enun han kitet h̄iras. H̄ir n̄inapen naam̄ipre menmen me Jisas Krais m̄it nisesim. **22** Te yi yertei Timoti au. H̄irak m̄itik yaaik han kitet h̄irekes au han kitet yi m̄it. H̄irak kekepa hawir wewepyapir h̄im̄ me God kep̄ir ke n̄ikan k̄ikaap haai k̄irak. **23** Maain hi

---

\* **2:16** Fl 1:10; 1Te 2:19; Ais 49:4; Ga 2:2      \* **2:17** Ro 15:16; 2Ti 4:6      \* **2:18** Fl 3:1, 4:4      \* **2:21** 2Ti 4:10

ertei mekam mamnen h̄ir nerekyewem te hi hare esiuwe Timoti kaknen yi m̄it. <sup>24</sup> Hi han kitet M̄itik Iuwe God kak̄kepa hi eno witeik waswas te hi hetike Timoti haw̄ir waunen wauri.

*Pol katip him me Epafroditas*

<sup>25</sup>\*Hi han kitet hi eriuwet Epafroditas kaknen yi m̄it h̄irak kai yinak ki yinak, h̄irak ketikewa haw̄ir wir̄ak menmen miut̄ip me God war ke m̄it ne ami n̄iriakem. N̄ipaa yi yeriuwetek kan kekepa me menmen. <sup>26</sup> H̄irak hanhan kak̄ir yi m̄it kentar yi yemtau h̄irak k̄inap te h̄irak k̄inapen yi hanhanek h̄irak k̄inap. <sup>27</sup> N̄ipaa menep h̄irak kaa te God han tewen̄inek kekepik h̄irak kaa au kepu. H̄irak han tewen̄inek kerekek au. H̄irak han tewen̄ina ap kenipek kaa te menmen im ap merewaank han kai, hi wen hau hekre w̄inak enuk. <sup>28</sup> Te hi heriuwetek waswas kakno kakri yi m̄it te yi eiȳrek yi han yaaik eiriuwerek. Yi han yaaik eiyu te hi han yaaik eriwi. <sup>29</sup>\*H̄irak kakiun wit yi yaȳrek yi han yaaik eiriuve M̄itik Iuwe h̄irak kewisik ap kaa au. M̄itik kar m̄itik ik ek yi han ekitet h̄irak iuwe eiȳintar <sup>30</sup> h̄irak ap hanhan h̄irak h̄irekes kaku au. H̄irak han kitet menmen me Krais, h̄irak menep kaki, h̄irak kekreh̄ir ki h̄irak kekepa wiſenum te h̄irak k̄inap.

### 3

*Keimin kises him me Jisas Krais h̄irak m̄itik yaaik*

---

\* **2:25** Fl 4:18   \* **2:29** 1Ko 16:16, 18; 1Ti 5:17

**1** \*Nai yinan h̄im im m̄ikaru hi hetpiyem. Yi han yaaik eiyu eiriuwe M̄itik Iuwe. Menmen n̄paa hi hewisiyem, in ek hi hewisiyem heteipim. Hi ap h̄inapen hewis̄m heteipim. Hi hewis̄m mamkepi te yi eiyu werek werek.

**2** \*Yi naanmamre h̄iras me m̄it ein h̄ir enun n̄tre nepere me yaank, h̄ir nanri han ki te yi eiyises menmen me n̄paa ein me Moses. Yi naanmamre h̄iras me m̄it in h̄ir nat̄p yi eirekir ȳink ki. **3** \*Haiu m̄it in haiu keriyen m̄ire m̄it God kehim̄tenai haiu m̄it n̄rak mentar haiu mewen̄pi God meriuwe H̄im̄in Yaaik k̄irak, haiu mat̄p Krais Jisas h̄irak Yaaik haiu misesik. Haiu ap han kitet haiu merekir ȳink kaiu h̄irak kak̄ikepai haiu mamit h̄im̄in yaaik haiu mamu mamtike God taau. **4** \*Hi hanhan te hi hises menmen me m̄it h̄ir nerekir ȳink hi hisesim te hi au h̄inapen. M̄it han h̄ir han kitet h̄ir nerekir ȳink te menmen im mamkepi h̄ir nanu werek, hi hertei n̄paa hi hin̄ni me menmen im. **5** \*N̄paa hi hemkretuk hi hepu w̄i hispinak wikak (8), m̄it nerekir ȳink kai. Miye wina hi m̄itik ke Isrel ke weiw̄ik me maam kai Bensamin. Hi Hibru hi ke weiw̄ik me Ebrahim kerek. Hi epei hises h̄im me God werek werek hentar hi hises h̄im me m̄it ne Farisi. **6** \*Hi han kitet hi h̄iriak menmen iuwe me God te hi hewaank m̄it miyap̄ir kerek nises h̄im me Krais h̄ir ne weiw̄ik me God. M̄it kerek h̄ir nin̄na nat̄p hi hises h̄im me Moses werek o au, h̄ir nat̄p hi yaaik, menmen enum au. **7** \*N̄paa

\* **3:1** Fl 4:4    \* **3:2** Sam 22:16, 20; Rev 22:15    \* **3:3** Ro 2:29

\* **3:4** 2Ko 11:18, 21    \* **3:5** Lu 1:59; Ro 11:1; 2Ko 11:22; Ap 23:6

\* **3:6** Ap 8:3    \* **3:7** Mt 13:44, 46

hi han kitet h̄iram menmen iuwe te in ek hi han kitet h̄iram menmen weinim te hi hises Jisas Krais h̄irak kakikēpa hahu werek werek.<sup>8</sup> Hi han kitet menmen im n̄paa hi hisesim h̄iram weinim keremem au. Menmen yapirwe hi han kitetim h̄iram weinim mentar hi hertei hi hises Krais te menmen m̄rak minin menmen yapirwe me n̄paa mamkaap mit nanu nantike God. Hi epei heweikin sip ewet menmen yapirwe marim hi han kitet h̄iram m̄re menmen enum meit teipe wenut eim te hi ehises Krais werek werek.<sup>9</sup>\* In ek hi ap h̄iriak menmen iuwe hises menmen me him me Moses werek werek te God katip hi mitik yaaik au. God katip hi yaaik hentar hi hemtau him me Krais hi mitik ke weiwick m̄rak. God kewetai menmen yaaim mekre han kai kentar haiu mises him me Krais keremem.<sup>10</sup>\*Hi hanhan menmen im. Hi hanhan hertei Jisas Krais werek werek ketike menmen iuwe m̄rak n̄paa h̄irak ketiwem wi h̄irak kinaaiwir herwe hei h̄irak kekrit kepu. Hi hanhan menmen n̄paa menep Krais h̄iram mamiyep mamkaap han kai kaki ke menmen enum me ti kakir ke wi n̄paa h̄irak kaq kentar nu tentarakit.<sup>11</sup>\*Hi h̄iriak menmen im te maaain, hi hahi, h̄irak kakikoya hi piqe ekrit ehu ekiterek.

*Pol hanhan h̄irak kakre mitik yaaik kakir ke Jisas*

<sup>12</sup>\*Hi ap hatip hi epei hises menmen im me Krais werek werek o hi epei mitik yaaik. Au, hi

---

\* **3:9** Ro 3:21-22    \* **3:10** Ro 6:3-5, 8:17; Ga 6:17    \* **3:11** Ap 4:2; Rev 20:5-6    \* **3:12** 1Ti 6:12, 19; Ap 9:5-6

wen hisesim te hi har ke Krais hentar hı̄rak epei kehimitena hi mıtık kırak. **13-14**\*Nai yinan hi ap han kitet hi epei yaaik hepır ke hı̄rak. Au, hi hı̄rak menmen im: Hi heweikin sip ewet menmen me nipaā ein, h hı̄re mıtık kesiuknen resis kakıt menmen, hi hises menmen me God iuwe te maain hi ehıt menmen hı̄rak kehimitan haiu mıt em. Hı̄ram menmen im em: God kenınau keriuve menmen Krais Jisas epei kırı̄akem te hi ano ehu etikerek.

**15**\*Haiu mıt haiu mire iuwe me menmen me God haiu mau han kiutıp me hım hi epei etpiyem. Yi mıt han ne yi mıt ein yi han kitet menmen ham te God kakteikni hı̄ram enum yi ap eiyisesim au. **16**\*Yi ap han ekitet menmen im yapırwe emit! Menmen me God nipaā haiu misesim, yi yetikewai haiu wen mamisesim wīsenum te haiu mamre yaain mamır ke Krais.

**17**\*Nai yinan yi wen eiyises menmen hi hı̄rakem. Yi eiyı̄himitan mıt hı̄r nises menmen nipaā yi yır haiu mıt in haiu misesim meteikniyem, te yi yises menmen mır. **18**\*Nipaā wī yapırwe hi hetpi te in ek hi menep hi hı̄kıt hi hetpiyem heteipim. Mıt han nare nises Krais te hı̄r neriuwe menmen enum hı̄r nırı̄akem netek-nai hı̄r nisesik au, hı̄r nemipin. Hı̄r nı̄re mıt enun nepan ne Krais. **19**\*Mıt narik nanı̄waank hı̄ras hı̄r nanı̄no si takı̄kneni nanı̄ntar hı̄r nises han ke yı̄nk kır keremem, God au. Hı̄r han yaaik newepyapır menmen enum hı̄r nırı̄akem

---

\* **3:13-14** 1Ko 9:24    \* **3:15** 1Ko 2:6    \* **3:16** Ga 6:16    \* **3:17**  
1Ko 4:16; 1Te 1:7; 1Pi 5:3    \* **3:18** 1Ko 1:23; Ga 6:12    \* **3:19** Ro  
16:18, 8:5-6

menip mit hir yink enuk neriuwerem. Hir han kitet menmen me ti keremem. Yi ap eiyises menmen mir au emit! **20** \*Haiu mit ne ti ik e au, haiu mit ne wit ke God, haiu memerir Mitik Iuwe kaiu Jisas Krais hirak kaknaaiwir wit ke God kaknen kaktaihis. **21** \*Hirak kaknen kaktaihis, hirak kakikrehir yink kaiu maain kaki, hirak kaknipec kakweikinhis kakre yink kirak yaaik iuwe kakriuwe menmen iuwe mirak hiram werek te maminin menmen yapirwe te hirak naanmamprewem.

## 4

*Yi mit han yaaik eiyu yi han kiutip eiyu han ekitet menmen yaaim*

**1** \*Te nai yinan yi han tokik eiyu eiyintar menmen hi epei hetpiyem. Hi han tewenini hi hanhan pike enen eri, hi han yaaik heriuwi hi ewenipi yi mit. Mit han nanir menmen yi yiriakem, hir natip hiram menmen yaaim hi heteikniyem.

**2** Yuodia hi hetput him manp. Sintiki hi hetput him manp. Yi miyapir wikk yi eikiyan eiyu han kiutip eiyises Mitik Iuwe Krais. **3** \*Hi hituthi ti mitik yaaik kerek nipaah hetikewa wiriaak menmen miutip, ti akaap miyapir wikk en enu han kiutip nentar hir nekiyan nekepa natip mit miyapir him me God, hir netike Klemen. Mit miyapir han ne yi mit ein yi yetikeri yekepa te

---

\* **3:20** Ef 2:6, 19    \* **3:21** Ro 8:29; 1Ko 15:28, 43-53    \* **4:1** 1Te 2:19-20    \* **4:3** Sam 69:28; Lu 10:20; Rev 20:12

God hı̄rak kertei niuk mi mekre han kı̄rak yi nı̄kerek nı̄rak.

<sup>4</sup>\*Yi han yaaik eiyu eiriuve Mıtık Iuwe Krais. Hi hetpiyem heteipim: Yi han yaaik eiyu.

<sup>5</sup>\*Yi eiwis mıt yapırwe hı̄r enırtei yi mıt ap yises han ki ke menmen yapırwe au. Yi yemtau hı̄m me mıt han yentar Mıtık Iuwe Krais kau menep, hı̄rak kau ketikewi. <sup>6</sup>\*Yi ap yı̄naain han kitet menmen yapırwe au emıt! Yi han yaaik eiriuve God yi eiyitwekhi me menmen yi yı̄naain han kitetim, <sup>7</sup>\*te God kakı̄kepi kakriuve menmen mı̄rak haiu ap merteiyem hı̄rak naanmampri kaknipi yi mıt yi han yaaik eiyu yi han ekiet menmen werek werek eiyı̄ntar menmen Krais epei kırı̄akem.

<sup>8</sup>\*Hı̄m im mı̄karu hi ehı̄tpiyem. Yi han ekiet yapırwe menmen hı̄ram ap me memipın au hı̄ram yaaim, menmen mıt han kitet hı̄ram yaaim. Yi han ekiet menmen hı̄ram menip God ketike mıt hı̄r han yaaik, hı̄ram yaaim te hı̄r mıt hanhan nanisesim. Mekam hı̄ram yaaim mı̄re menmen im yi han kitetim keremem. <sup>9</sup>\*Menmen hi epei hetpiyem yi yı̄ra hi hisesim, yi eiyisesim te God kerek hı̄rak kaknipi yi han yaaik eiyu, hı̄rak kaku kaktikewi kakı̄kre han ki.

*Pol han yaaik keriuwe mıt ne Filipai kendar hı̄r newetiwek menmen mekepik*

<sup>10</sup> Hi han yaaik iuwe heriuwe Mıtık Iuwe Krais hendar nı̄paa yi han tewenı̄na yekepa. Nepei ein

---

\* **4:4** Fl 3:1    \* **4:5** Hi 10:25, 37; Je 5:8-9    \* **4:6** Mt 6:25-34;

1Pi 5:7; Kl 4:2    \* **4:7** Ais 26:3; Jo 14:27; Kl 3:15    \* **4:8** Ro 12:17

\* **4:9** Ro 16:20; 1Ko 14:33; 1Te 5:23

ere in yi han tewen̄na te yi ap yekepa au. In ek yi yekepa yeweto menmen. <sup>11</sup>\*Hi ap hetpiyem hentar hi ap hetenen menmen au. Hi epei hertei mekam mamnen hi ap hanhan menmen emit. Hi ehu han yaaik heriuwerem. <sup>12</sup>Hi hertei hepu har ke mitik ketenen menmen aurek, hi hepu har ke mitik ketenen menmen yapirwe. Hi epei hertei werek te wi mekam o wit mekam hi hau en, hi n̄inp̄ meiyo o hi tu iuwe, hi han yaaik ehu. <sup>13</sup>\*Hi werek te hi h̄riak menmen yapirwe hi epei hetpiyem heriuwe menmen iuwe Krais kewetewem kewisim mekre han kai.

<sup>14</sup>Yi yerekkyo yaaim yi yekepa yeweto menmen yaaim me wi menmen enum epei man mewa.

<sup>15</sup>\*N̄paa me wi hi h̄naaiwir provins Masedonia hewepyapir him me God yi mit ne wit Filipai keriyen yi yeweto menmen yi yire mit n̄rak yinan newetiwek menmen, h̄rak kewetir menmen. Mit nerer wit wit nekepa au. Yi keriyen. <sup>16</sup>N̄paa hi hepeit wit Tesalonaika yi yekepa yeriuwet menmen yi pike yeriuwetem yeteipim yekepa. <sup>17</sup>Hi ap hanhan menmen me yi mit yeriuwetewem au. Hi hanhan God kakweti menmen yaaim mentar menmen yi yerekewem.

<sup>18</sup>\*Hi epei heit menmen yapirwe minin menmen hi hanhanem. Epafrodaitas keteninem yi yeriuwetek h̄rak kan kewetewem. Menmen im yi yewetewem h̄ram yaaim menip God h̄rak han yaaik keriuwi. <sup>19</sup>God kerek epei keriuwt Jisas h̄rak kan kekepai haiu mit, h̄rak kete-

---

\* **4:11** 1Ti 6:6    \* **4:13** 2Ko 12:10; 2Ti 4:17    \* **4:15** 2Ko 11:9

\* **4:18** Fl 2:25; Esi 20:41; Ef 5:2

nen menmen yapırwe, hı̄rak kakwetai menmen haiu metenenim au hı̄rak naanmamprai te haiu mamu werek werek. <sup>20</sup> Hi hanhan God kerek hı̄rak Haai kaiu, mıt hı̄r nanwenipi niuk mı̄rak, hı̄rak yaaik tipmain enum eik.

*Pol katıp him kike mīkaru*

<sup>21</sup> Hi hetike nai yinan in haiu matıp yi naiu yinan en yises Krais Jisas niutıp niutıp haiu metpi yi yaain. <sup>22</sup> \*Mıt yapırwe in nises Krais Jisas hı̄r netpi yi yaain. Mıt han nises Krais kerek nırıak menmen me mıtık iuwe Sisa, hı̄r netpi him iuwe nar ik: “Yi yaain.” <sup>23</sup> Hi hanhan Mıtık Iuwe Jisas Krais kerek kakrekyi yi eikiyan eiyu werek werek, hı̄rak kaku kakı̄kre han ki kaku kakıt.

*Mepır keremem*

---

\* **4:22** Fl 1:13

**Him Yaaim Me God  
The New Testament in the Au language of Papua New  
Guinea  
Nupela Testamen long tokples Au long Niugini**

copyright © 1992 Wycliffe Bible Translators, Inc.

Language: Au

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-03

---

PDF generated using Haiola and XeLaTeX on 11 Nov 2022 from source files dated 9 Oct 2020

4e85f348-3df4-5add-b32a-49bcafe3752a